

Ban celebra cultura y folklore di nos Dushi Aruba!

Comunidad henter ta uni dia 17 di maart pa celebra 25 Aña di Status Aparte y 35 Aña di Himno y Bandera

PREPARACIONNAN pa e fiesta nacional di mas grandi cu Aruba a yega di conoce ta den “full swing”. E celebracion di nos isla su di 5 lustro di Status Aparte y e di 35 aniversario di e introduccion di nos simbolonan nacional, nos Himno y Bandera ta bay ta tremendamente alegre, bunita y digno di un pueblo cu ta biba uni manera

un famia grandi.

Tur aspecto cu ta haci nos Arubianonan orguyoso y contento di por disfruta di biba na Aruba ta wordo celebra ariba diahuebs dia 17 di maart cu e gran Feria Dushi Tera.

Plaza Betico Croes lo ta na e centro di e celebracion cu ta in-

clui shownan folklorico di musica, canto y baile, como tambe dos avenida unda lo tin artista y artesano local ta bende nan obranan y expertonan di cushina casero Arubiano y cuminda internacional lo ta bendiendo cuminda y co'i dushi.

E programa di shownan cultural, baile y canto y bandanan



popular ta cuminsa pa 6'or di atardi ariba e stagenan na Plaza Betico Croes, e plaza pariba di Cas di Cultura y e plaza dilanti di Centro Bolivariano. Entretenimento pa e anochi aki ta inclui Nico Connor ariba steelpan, Edgar Kelkboom ariba harpa, Tino Ruiz cu su mandolin, canto di Mark Gonzalez, e bandanan Tsunami, Prive, So What?, Transformerz, Robert y Su Solo Banda Show, Youth Xtreme, Claudius y OREO y un All Star Band consistiendo di 26 musico profesional local y cantantenan popular.

Ariba e stage dedica na celebracion di Aruba su folklore lo tin un variedad grandi di show. Cada 15 minuut un presentacion diferente ta ariba programa, incluyendo scolnan di baile, gruponan di baile, e ganadonan di e festival Canto na Nos Himno y Bandera y un serenata nacional na encargo di Tica Giel y su coro.

Ariba Stadionweg, for di Unoca te cu Plaza Betico Croes artesanonan y artistanan plastico lo muestra nan obranan cu tambe lo ta na benta. Un obra cumpira na un celebracion asina significativo sigur lo ta un bunita

recuerdo di e dia aki pa semper.

Rumbastraat tambe lo wordo cera y aki lo tin un ambiente hopi ameno estilo di un “street-food festival” cu specialidadnan culinario local y internacional. Adicionalmente lo tin Dino Jump, cotton candy y mas atraccion pa tene e muchanan contento.

Pa 11:50 publico presente ta wordo invita pa reuni ariba Plaza Betico Croes pa yama nos Dia Nacional bonbini cu un show di vuurwerk. Despues di 12'or, Prome Minister di Aruba, Sr. Mike Eman; representante di Gobierno Hulandes, Minister di Relacionnan den Reino Sr. Piet Hein Donner y Prome Minister di Corsou, Sr. Gerrit Schotte lo adresa e publico cu nan deseonan y reflexionnan ariba e conmemoracion di Aruba su Status Aparte.

Claudius Philips y OREO lo cera e anochi aki cu un show di 12'or y mey pa 1'or y mey. Bishita Aruba su Feria Dushi Tera y celebra nos dushi Aruba, nos Dushi Tera, nos simbolonan nacional y nos Status Aparte uni manera un famia grandi.